

բութիւնը վճռական կերպով բողոքում է վրաց զօրքերի սանձարձակութիւնների դէմ մի շրջանում, որը կազմում է Հայաստանի հողամասը և բռնութեամբ գրաււած է վրաց զօրքերով: Եթէ անմիջապէս միջոցներ ձեռք չառնէք վերջ տալու, հետեանքների պատասխանատուութիւնը կառավարութիւնս վերցնում է իր վրայից»:

Շուտով յայտնի դարձաւ, նոյնպէս, որ միայն Ուզունլարը չէր վրաց զօրքերի սխաղործութեանց զոհը. Սղրի, Ամուչ, Ակորի և մի շարք ուրիշ գիւղեր էլ ենթարկւել էին հարստահարութիւնների, կողոպտուի ու բռնութեանց: Եւ նման երեւոյթները ընդհանուր էին Լոռիի բոլոր վայրերում, ուր կանգնած էին վրաց զօրամասերը:

Մինչ հայ-վրացական սահմանի վրա տեղի էին ունենում այս դէպքերը, Երևանում կատարւում էին դիւանագիտական բանակցութիւններ Հայաստանի և Վրաստանի միջև: Նոյեմբերի սկզբներին Երևան էր եկել Վրաստանի ներկայացուցիչ Ս. Մդիփանին՝ հայ-վրացական սահմանային վէճը լուծելու նպատակով: Նոյ. 29-ին նա գրաւոր կերպով հաղորդեց Հայաստանի արտաքին գործոց նախարարութեան, որ ինքը «լիազօրւած է վերջնականապէս լուծելու սահմանային հարցը և կայացելիք վճիռը ներկայացնելու Վրաստանի կառավարութեան ի վաւերացումն»: Եւ նոյն գրութեան մէջ որոշում էր վրացիների սահմանային պահանջները. «վրաց հանրապետութեան կառավարութեան պահանջով սահմանագիծը Հայաստանի և Վրաստանի հանրապետութիւնների միջև պէտք է անցնի Թիֆլիսի նահանգի հին սահմանով, այսինքն՝ այն գծով, որը այժմ բաժանում է Ախալքալաքի ու Բորչալուի գաւառները նախկին Երևանի նահանգի նախկին Ալեքսանդրապոլ գաւառից՝ հարաւում, իսկ արեւելքից՝ այն գծով, որը բաժանում է Բորչալուի գաւառը նախկին Գանձակի նահանգի նախկին Ղաղախի գաւառից»:

Ի պատասխան այս գրութեան, Ս. Տիգրանեանը հաղորդեց, նոյնպէս գրաւոր, որ սահմանը Հայաստանի և Վրաստանի միջև որոշւած և հայ ու վրաց ներկայացուցիչների միջև մէկից աւելի անգամներ հաստատւած է 1917 թւի ընթացքին: Այդ սահմանը, որ հիմնւած է ազգագրական սկզբունքի վրա, Հայաստանի կառավարութեան համար ի զօրու է և այժմ: Ըստ 1917թ. հայ-վրացական համաձայնութեան «Ախալքալաքի գաւառը ամբողջովին և Բորչալուի գաւառի մեծ մասը, ուր հայ ազգաբնակչութիւնը կազմում է բացարձակ մեծամասնութիւն, անկապտելի կտորն են Հայաստանի: Միաժամանակ Բորչալուի գաւառի հիւսիսային մասը և Թիֆլիսի գաւառի հիւսիսային մասը մինչև Թիֆլիս քաղաքը, չնայած որ այս մասում հայ բնակչութիւնը աւելի է վրացականից, մտցւած են Վրաստանի կազմի մէջ՝ այն հաշուով, որ Վրաստանի հայերը կունենան ազգային-մշակութային ինքնորոշման երաշխիքներ»: Եթէ, սակայն, վրաց կառավարութիւնը պնդում է նոր սահմանագծի վրա, այն ժամանակ սահմանային խնդիրը պէտք է քննուի բովանդակ ծաւալով՝ ոչ միայն Ախալքալաքի և Լոռիի, այլ և «այն շրջանների (Բորչալուի ու Թիֆլիսի գաւառների) վերաբերմամբ, որոնք կարող են առանց վէճի միացւել Վրաստանին միայն այն դէպքում, երբ Վրաստանի և Հայաստանի հողային բաժանման ամբողջ նախկին ծրագիրը պահպանւի»: